



**CUN PLUI LENGHIS SI VEN SÙ MIÒR  
 ZNANJE VEČ JEZIKOV NAS BOGATI  
 CON PIÙ LINGUE SI CRESCE MEGLIO  
 MIT MEHR SPRACHEN WÄCHST MAN BESSER**

**DOCUMENTO PER  
 L'ASSEMBLEA  
 DEL PATTO PER  
 L'AUTONOMIA**

**PALMANOVA  
 30 NOVEMBRE 2024**



Il Pat pe Autonomie al è un moviment che si inlidrise tal complès di teritoris che vuê a son cjapâts dentri te regjon Friûl – Vignesie Julie e al à tant che prin obietîf chel di dâ plui fuarce ae lôr autonomie, viodude tant che imprest di cressite politiche, civîl, sociâl e economiche, tant che dirit fundamentâl e at di responsabilitât di bande des comunitâts locâls di decidi dal lôr destin storic.

Di un pont di viste storic lis fondis de autonomie speciâl dade a cheste regjon tal moment de sô istituzion a jerin trê:

- la cundizion di regjon di frontiere logade suntun confin pericolôs;
- une cundizion socioeconomiche di sotsvilup, che si diferenziave a fuart di chê de plui part des regjons de Italie setentrionâl
- la presince di minorancis linguistichis e la lôr tutele.

In di di vuê al si conven a nivel gjenerâl, ancje se dispès dome a peraulis, che la sole fonde restade par che il Friûl – Vignesie Julie al vedi une autonomie speciâl e je la compresince tai siei teritoris di comunitâts autoctonis che a fevelin idiomis di grups linguistics diferents dal talian: il furlan, il sloven e il todesc.

In plui di chestis lenghis, cemût che al sucêt ancje in altris regjons de Republiche Taliane, a son ancje varietâts venitis, lis lenghis des comunitâts sinti e rom e, simpri di plui, lis lenghis des comunitâts di imigrâts.

Se si acete, cemût che a fasin ducj, che la situazion linguistiche e je la sole fonde, o almancul la fonde principâl, che e pues poiâ la autonomie de regjon, si scuen osservâ che e je une fonde une vore menaçade: par vie dal model ideologjic nazionalist cjapât sù dal stât talian, tes sôs diviersis fasis, la presince di lenghis diviersis dal talian e je stade calcolade un mâl di eliminâ e dal 1866-1918 incà e je stade metude in vore une politiche clare di sostituzion linguistiche, indreçade a fâ sparî il furlan, il todesc e il sloven.

Ancje se la Costituzione de Republiche Taliane e impegne a tutelâ lis minorancis linguistichis, lis leçs previodudis di chest principi fundamentâl a son rivadis dome ae fin dal secul XX e pe plui part no son ancjemò metudis in vore, soledut tai lôr ponts plui impuartants.

Lis trê comunitâts linguistichis storichis, furlane, slovene e todescje, si cjatin par altri in situazions diferents, ma vuê a son dutis in pericol grâf:

- la lenghe furlane, a difference di chê slovene e todescje, no à un stât dulà che e sedi uficiâl, duncje no pues gjoldi di professionalitâts, materiâi didatics, editoriâi, comunicatîfs e v.i. produsûts di altris bandis: il so progrès o recupar al è simpri ostacolât e i dâts statistics a segnin une pierdite progressive une vore grave, che lu à fat sparî scuasi dal dut tes gjenerazions plui zovinis;
- la lenghe slovene e pues poiâsi ancje su la Republiche di Slovenie pes risorsis linguistichis, e in cualchi zone e pues ancje fâsi fuarte di tratâts internazionâls, ma e à une situazion dividude: a nivel di superficie di teritori, la plui part de zone slovenofone e je tocjade di un dispopolament une vore fuart; tes citâts, soledut a Triest, dulà che la presince demografiche e je avonde salde e la tutele e je significative, a son dinamichis di segregazion e di autosegregazion de comunitât;
- ancje il todesc al pues cjapâ fuarce des grandis risorsis e dal grant status che la lenghe e à a nivel internazionâl, ma cheste fuarce dispès no si rive a declinâ in formis che a zovin aes piçulis comunitâts locâls, soledut tai paîs di Sapade, Sauris e Tamau. Cun di plui dutis lis zonis dulà che e je presinte la lenghe todescje, a son tocjadis a fuart dal dispopolament de mont.

Cence un intervent significatîf di politiche linguistiche, al è clâr che tal zîr di une gjenerazion la

specialitât linguistiche dai teritoris dal Friûl – Vignesie Julie e sarà dome residuâl, in pocjîs altrîs gjenerazions e sarà sparide dal dut.

De sô fondazion e fin in di di vuê la Regjon Autonome Friûl – Vignesie Julie e je simpri stade in man a fuarcis politicis che a vevin i centris di comant a nivel talian, e tai ultins 15 agns i sistemis di podê e di elezion a àn fat che la istituzion regionâl e vedi pierdût ancjemò di plui il leam cui siei teritoris e cu lis sôs comunitâts: in paralêl cun cheste situazion la politiche linguistiche no je mai stade, e vuê mancûl di simpri, a pro di furlan, sloven e todesc. E je stade al massim gjestion di un probleme di taponâ e, cul timp, di eliminâ, concession dal minim pussibil par fâ tasê i militants che a sostegnin lis lenghis autoctonis, gjestion di misaris clientelis di consens. Une sielte suicide dal pont di viste linguistic e autonomistic.

Al è clâr che jenfri salût/salvece linguistiche e autonomie reâl e je une relacion di dipendence bidirezionâl: di une bande la specialitât linguistiche e je la fonde de autonomie, di chê altre dome l'esercizi di une autonomie reâl al pues salvâ il furlan, il sloven e il todesc.

In consecvence di cheste situazion, i principis fundamentâi dal Pat pe Autonomie, in fat di politiche linguistiche a son:

- incressi lis cognossincis e la cussience dai rapresentants e dai militants dal Pat pe Autonomie su lis problematichis linguisticis;
- impegnâ e coordinâ i aministradôrs elets pal Pat pe Autonomie in azions concretis e positivis di politiche linguistiche che a son za pussibilis te realtât legâl e aministrative di vuê;
- evidenziâ lis criticitâts e lis omissions dai responsabii des aministrazions locâls che fin cumò, tai fats, a son lâts daûr di chê politiche linguistiche che e je stade plui cuintri che no a pro des lenghis propriis e dal plurilinguism e no àn rivât a fâ nuie altri di plui e di miôr, nancje là che al jere pussibil fâlu a nivel regionâl e comunâl;
- rivâ a otignî il guvier de Regjon par incressi la sô autonomie reâl ancje tal setôr linguistic, prin di dut slargjant lis competencis su la istruzion;
- favorî une politiche linguistiche di recupar reâl, fondade sui trê setôrs classicis di corpus, status e soledut di acuisizion di gnûfs locutôrs, par dutis lis lenghis propriis;
- favorî la normalizazion dal plurilinguism, tant che mût di convivenza civîl, solidarie, pacifiche, vierte e integradore tra dutis lis personis che a vivin te regjon, cualsisei che e sedi la lôr prime lenghe: che e sedi il talian, il furlan, il sloven, il todesc, in cualsisei variante, o cualsisei lenghe di imigrazion;
- meti in vore la integrazion jenfri politiche linguistiche e politicis demografiche, ambientâl, economiche, dal benstâ sociâl, di gjenar e v.i., parcè che al è clâr che a son leadis a strent e a dipendin dutis tra di lôr;
- incressi il numar dai operadôrs linguistics, permetiur di rivâ a posizions professionâls almancul dignitosis, favorî la cressite continue des lôr competencis (che e je une robe che, soledut tal câs dal furlan, no si fâs di passe vincj agns);
- disvilupâ occasions periodichis di confront cun altrîs comunitâts linguisticis in Europe (ancje di chês rapresentadis te ALE/EFA) e soledut, par vie de compatibilitât costituzionâl e legislative, inte Republiche Taliane (cun riferiment particolâr aes Provinciis di Bolzan e di Trent) e cjapâ di lôr esemplis positîfs.